


1 4
1777
12



游



記



門 44
號 1777
卷 12



游城南記

早稻田大學圖書館
藏書
333.31

欽定四庫全書總目卷七十一

游城南記一卷

宋張禮撰禮字茂中浙江人元祐元年與其友楚人陳明微游長安城南訪唐代都邑舊址因作此記而自為之注凡門坊寺觀園囿村墟及前賢遺迹見於載籍者敘錄甚備如嘉話錄載慈恩寺題名始於張莒禮則引唐登科記謂進士中有大中十三年及第之張台而無張莒又長安志載章敬寺本魚朝恩莊後為章敬皇后立寺故以為名禮則以宋代寺基與志所載地理不同而疑其已非古址皆能據所目見而考辨之其徵據頗為典核所列金石碑刻名目亦可與集古錄諸書互相參證每條下間有續注不知何人所增中有金代年號其薦福寺一條又有辛卯遷徙之語案辛卯為

游城南記提要

金哀宗正大八年史載是年四月元兵克鳳翔兩
行省棄京兆遷居民於河南所云遷徙當卽此事
蓋金末元初人也

西漢書論魏郡曰景而後魏之其地魏郡也
魏郡宋升并基與志相違故魏郡不同而魏其日
并本并傳恩故魏郡爲章帝皇立并効以爲合
十三年又與之題台而無魏郡又具矣志相違
各欲效魏郡魏郡與并恩登林時魏郡士中育大中
並長欲離魏郡魏郡魏郡魏郡魏郡魏郡魏郡
時所自魏郡之若其門也寺魏郡魏郡魏郡魏郡
人則魏郡魏郡魏郡魏郡魏郡魏郡魏郡魏郡
宋魏郡魏郡魏郡魏郡魏郡魏郡魏郡魏郡
魏郡魏郡魏郡魏郡魏郡魏郡魏郡魏郡魏郡

游城南記

宋 浙 右 張 禮 茂 中 撰

古一

元祐改元季春戊申明微茂中同出京兆之東南門
張注曰唐皇城之安上門也至德二載改爲先天門
尋復舊肅宗以祿山國讐惡聞其姓京兆坊里有安
字者率易之續注曰志總序云唐開元元年改雍
州爲京兆府以京城爲西京天祐元年昭宗東遷降
爲佑國軍梁開平元年改府曰大安越二年改軍曰
永平後唐同光二年復爲西京晉天福元年改軍曰
晉昌漢乾祐元年改軍曰永興其府名皆仍舊有宋
因之故其南北相直之街亦曰安上

歷興道務本二坊
張注曰興道坊在安上門街之西景龍三年改瑤林

字或可也

一

坊務本坊在安上門街之東與興道坊相對景龍二年改玉樓坊景雲元年並復舊二坊之地今為京兆東西門外之草市餘為民田

由務本西門入聖容院觀薦福寺塔

張注曰聖容院蓋唐薦福寺之院也今為二寺寺之

浮圖今正謂之薦福寺塔尚存焉其寺文明元年立

謂之大獻佛寺天授元年改為薦福寺景龍中宮人

率出錢起塔十五層續注曰貞祐乙亥歲塔之纏

腰尚存辛卯遷徙廢蕩殆盡惟磚塔在焉

南行至永樂坊

張注曰即橫岡之第五爻也今謂之草場坡古場存

焉隋宇文愷城大興以城中有六大岡東西橫互象

乾之六爻故于九二置宮室以當帝王之居九三置

百司以應君子之數九五貴位不欲常人居之故置

元都觀大興善寺以鎮之元都觀在崇業坊大興善

寺在靖善坊其岡與永樂坊東西相直長安志云坊

東有裴度宅度欲入朝有張權輿上疏云度名應圖

識宅據岡原蓋嘗有人與度作讖云非衣小兒坦其

腹天上有口被驅逐言度曾討淮西平吳元濟宅據

岡原與興善元都相連故也

東南至慈恩寺少遲登塔觀唐人畱題

張注曰寺本隋無漏寺貞觀二十一年高宗在春宮

為文德皇后立為慈恩寺永徽三年沙門元奘起塔

初惟五層磚表土心效西域窣堵波即袁宏漢記所

謂浮圖祠也長安中摧倒天后及王公施錢重加營

建至十層其云雁塔者天竺記達觀國有迦葉佛伽

藍穿石山作塔五層最下一層作雁形謂之雁塔蓋

此意也嘉話錄謂張甚及進士第聞行慈恩寺因書

同年姓名于塔壁後以為故事按唐登科記有張台
無張甚台于大中十三年崔鋤下及第馮氏引之以
為自台始若以為張甚則台時已有題名之說焉塔
自兵火之餘止存七層長興中西京畱守安重霸再
修之判官王仁裕為之記長安士庶每歲春時游者
道路相屬熙熙中富民康生遺火經宵不滅而游人
自此衰矣塔既經焚塗圯皆剝而磚始露焉唐人墨
迹于是畢見今孟郊舒元興之類尚存至其他不聞
于後世者蓋不可勝數也續注曰正大遷徙寺宇
廢毀殆盡惟一塔儼然塔之東西兩龕唐褚遂良所
書聖教序及唐人題名記碑刻存焉西南一里許有
西平郡王李公晟先廟碑工部侍郎張或撰司業韓
秀弼八分書字畫歷歷可讀
倚塔下瞰曲江宮殿樂游燕喜之地皆為野草不覺有

黍離麥秀之感

張注曰江以水流屈曲故謂之曲江其深處下不見
底司馬相如賦曰臨曲江之隈洲蓋其地也劇談曰
曲江本秦隄洲唐開元中疏鑿為勝境江故有泉俗
謂之漢武泉又引黃渠之水以漲之泉在江之西旱
而禱雨有應今為濱江農家湮塞然春秋積雨池中
猶有水焉黃渠水出義谷北上少陵原西北流經三
像寺鮑陂之東北今有亭子頭故巡渠亭子也北流
入鮑陂鮑陂隋改曰杜陂以其近杜陵也自鮑陂西
北流穿蓬萊山注曲江由西北岸直西流經慈恩寺
而西歐陽詹曲江記其略曰茲地循原北峙迴岡旁
轉圓環四市中城坎窞窳窳港洞生泉翕原東西三
里而遙南北三里而近崇山濬川鉤結盤護不南不
北湛然中停蕩惡舍和厚生蠲疾涵虛抱景氣象澄

鮮滌慮延歡棲神育靈觀此可得其概矣唐進士新及第者往往汎舟游宴于此文宗時曲江宮殿廢十之九帝因誦杜甫哀江頭之詩慨然有意復昇平故事太和九年發左右神策軍三千人疏濬修紫雲樓彩霞亭仍敕諸司有力建亭館者官給閒地任營造焉今遺址尚多存者江水雖涸故道可因若自甫張村引黃渠水經鮑陂以注曲江則江景可復其舊不然疏其已塞之泉滍瀦歲月亦可觀矣樂游原亦曰園在曲江之北卽秦宜春苑也漢宣帝起樂游廟因以爲名在唐京城內每歲晦日上巳重九士女咸此登賞祓禊樂游之南曲江之北新昌坊有青龍寺北枕高原前對南山爲登眺之絕勝賈島所謂行坐見南山是也

出寺涉黃渠上杏園望芙蓉園西行過杜祁公家廟

張注曰杏園與慈恩寺南北相直唐新進士多游宴于此芙蓉園在曲江之西南隋離宮也與杏園皆秦宜春下苑之地園內有池謂之芙蓉池唐之南苑也杜祁公家廟咸通八年建石室尚存俗曰杜相公讀書堂其石室曰藏書龕續注曰石室奉安神主之室也

出啟夏門覽南郊百神靈星三壇

張注曰啟夏門唐皇城之南門也北當皇城之安上門少西蓋京城之南凡三門中曰明德門今謂之五門西曰安化門今謂之三門此其東門也三壇在門外西南二里百神靈星二壇頗毀而園丘特完南一里有蓮花村未詳其所以名也續注曰少西北有唐贈戶部尚書楊貞公廟碑晉公李林甫撰文王曾書王敬從題額次東南有唐相國令狐氏廟碑太和

三年劉禹錫撰并書陳錫篆額楊氏苗裔泰和閒尚
盛人呼為廟坡楊辛卯遷移後無聞焉

次杜光村

張注曰杜光村有義善寺俗謂之杜光寺貞觀十九
年建蓋杜順禪師所生之地順解華嚴經著法界觀
居華嚴寺證圓寂今肉身在華嚴寺

東南歷仇家莊

張注曰莊即唐宦官仇士良別業也士良死籍沒其
家後晉賜晉昌軍節度使安彥威安氏子孫世守之
士良墓碑俱存其南為郭子儀墓西南長孫無忌之
墓碑皆斷什續注曰撫定後府南趙村里皓陽觀
主李可貞喬志朴相過語余觀西北有二大碑云是
郭氏墓碑他日往觀其一壽州刺史郭敬之神道碑
敬之字敬之子儀父也以子儀貴贈太保徐國公碑

額御題韓國公苗晉卿撰序蕭華書其一郭氏所尚
昇平公主墓碑書撰姓名失傳

過高望西南行至蕭灌墓讀碑

張注曰灌嵩之父也碑乃明皇題額張說為文梁昇
卿書嵩墓別葬張曲

由趙村訪章敬寺基經撥川王論弓仁墓

張注曰五代周太子太師致仕皇甫元莊在趙村建
隆二年置墓在村東碑在其莊內章敬寺長安志曰
在通化門外本魚朝恩莊也後為章敬皇后立寺故
以為名殿宇總四千一百三十間分四十八院以曲
江亭館華清宮觀風樓百司行廡及將相沒官宅舍
給其用今此基不甚侈且與志所載地里不同豈四
十八院之一耶論弓仁者吐蕃普贊之族也世相普
贊戎言為宰相為論因以為氏聖曆三年以所統吐

渾七千帳降唐累有戰功死贈撥川王葬趙村張說為碑今已毀什字無存者獨其題額在焉

下勳蔭坡入牛頭寺登長老文公禪堂夜宿寺之南軒張注曰勳蔭坡今牛頭寺之坡也寺即牛頭山第一

祖徧照禪師之居也貞元十一年建內有徐士龍所撰碑太平興國中改寺曰福昌元豐癸亥長老道文

自南方來居于寺之北堂其南軒為延客之所今有朱公揆題壁

已酉謁龍堂循清明渠而西至皇子坡徘徊久之張注曰龍堂在牛頭寺之西寺故有龍泉塔院此堂

即其地也泉北有塔俗稱龍堂坡地甚平行中多植杏謂之杏花坪見杜翹勝游錄清明渠隋開皇初引

沈水西北流屈而東流入城當大安坊南街又東流至安樂坊入京城今其渠自朱坡東南分沈水穿杜

牧之九曲池循坡而西經牛頭寺下穿韓符莊西過章曲至渠北村西北流入京城皇子坡又在龍堂之

西秦葬皇子於坡底起冢於坡北原上因以名坡隋文帝改永安坡唐復舊

覽韓鄭郊居至章曲扣堯夫門上逍遙公讀書臺尋所謂何將軍山林而不可見因思唐人之居城南者往往

舊蹟湮沒無所攷求豈勝遺恨哉張注曰韓店即韓昌黎城南雜題及送子符讀書之

地今為里人楊氏所有鑿洞架閣引泉為池穿地得大鳴起信論碑之上篇鄭谷莊在坡之西今為里人

李氏所有章曲在韓鄭莊之北堯夫進士韋師錫之字也世為章曲人遠祖夔後周時居此蕭然自適與

族人處元及安定梁曠為放逸之友時人慕其閒素號為逍遙公明帝貽之詩曰香動秋蘭佩風飄蓮葉

衣北史有傳今其讀書臺立逍遙谷則在驪

山西南蓋亦慕夔而名之也杜甫何將軍山林詩有

不識南塘路今知第五橋又曰憶過楊柳渚走馬定

昆池今第五橋在韋曲之西與沈家橋相近定昆池

在韋曲之北楊柳渚今不可攷南塘按許渾詩云背

嶺枕南塘其亦在韋曲之左右乎嘗讀唐人詩集岑

嘉州有杜陵別業終南別業而石鼈谷高冠谷皆有

其居郎士元有吳村別業段覺有杜村閒居元微之

亦有終南別業蕭氏有蘭陵里梁昇卿有安定莊今

皆湮沒漫不可尋蓋不特何將軍山林而已

晚抵申店李氏園亭夜宿祁子虛書舍

張注曰申店夾瀉水之兩溪李氏名之邵字公材嘗

為進士祁子虛名徹李舍人壻也園之東有閣曰祕

春北有小軒曰明月

庚戌子虛邀飲韋氏會景堂及門主人出迓明微以為

不足子虛道其景且誦其詩明微聞之始入其奧

張注曰韋氏名宗禮字中伯世為下杜人蓋唐相之

裔家失其譜不知為何房城南諸韋聚處韋曲宜其

屬系易知然或東眷或西眷或逍遙公或鄭公或南

陂公或龍門公不知其實何房也中伯博學好古葺

治園亭奇花異卉中莫不有日與賓客宴游朝奉郎

白序題其堂曰會景中伯圃中有對金竹其狀與對

青相似長安有此竹者惟處士蘇季明張思道與中

伯三家而已

復相率濟瀉水陟神禾原西望香積寺塔原下有樊川

御宿之水交流謂之交水西合於灃北入于渭

張注曰長安志曰瀉水今名泥水一作坑水自南山

流至皇子坡今瀉水不至皇子陂由瓜洲村附神禾

塹上穿申店而原愈高鑿原而通深至八九十尺俗謂之坑河是也瓜洲村之東北原上滴水北岸上尚有川流故道西北過張王村之東又西北經內家橋又西北經下杜城過沈家橋杜城之西有丈八溝卽杜子美陪諸公子納涼遇雨之地滴水上原西北流而合御宿川水是名交水在香積寺之西南香積寺唐永隆二年建中多石象塔磚中裂院中荒涼人鮮游者

下原訪劉希古過瓜洲村

張注曰劉希古名舜才爲進士不第退居申店滴水之陰瓜洲村俗以爲牧之種瓜之地予讀許渾集有和淮南相公重游瓜洲別業詩淮南相公杜佑也佑三子師損式方從郁牧之從郁子也由此考之在佑已有瓜洲別業則非牧之種瓜也明矣今村南原上

有瓜洲墓豈始有瓜洲人居此而名之耶亦猶長安縣有高麗曲因高麗人居之而名之也

復涉滴水游范公五居

張注曰范公莊本唐岐國杜公佑郊居也門人權德輿爲之記纂敘幽勝極其形容舊史稱佑城南樊川有桂林亭卉木幽邃佑日與公卿宴集其間元和七年佑以太保致仕居此式方傳又云杜城有別墅亭館林池爲城南之最牧之之賦亦曰予之思歸兮走杜陵之西道若曲泉深池地平木老隴雲秦樹風高霜早周臺漢園斜陽衰草其地有九曲池池西有玉鉤亭許渾詩所謂九曲池西望月來池蹟尚存亭則不可考也又其地有七葉樹每朵七葉因以爲名羅隱詩所謂夏窗七葉連簷暗是也以是求之其景可知矣此莊向爲杜氏所有後歸尚書郎胡拱辰熙

中侍御史范異之買此莊于胡故俗謂之御史莊中有溪柳巖軒江閣圍堂林館故又謂之五居東上朱坡憩華巖寺下瞰終南之勝霧巖玉案圭峰紫閣粲在目前不待足履而盡也

張注曰朱坡在御史莊東華巖寺西牧之朱坡三絕句極言其景華巖寺貞觀中造寺之北原下瞰終南可盡其勝岑參詩所謂寺南幾千峰峰翠青可掬是也終南一名太乙一名地肺關中記曰終南太乙左右三百里內為福地柳宗元碑曰據天之中在都之南西至于襄斜又西至于隴首以臨于戎東至于商顏又東至于太華以距于關秦末四皓隱于其間後因立廟唐文宗詔建終南山祠冊為廣惠公圭峰紫閣在祠之西圭峰下有草堂寺唐僧宗密所居因號圭峰禪師紫閣之陰即漢陂杜甫詩曰紫閣峰陰入

漢陂是也太乙在祠之東霧巖玉案附麗而列二峰之間有冰井經暑不消長安歲不藏冰夏則取冰于此紫閣之東有高觀峪岑參作高冠蔣之奇作高官未知孰是

已而子虛希古開尊三門寺僧子齊出詩凡數百篇皆詠寺焉予賞蘇子美詩明微吟唐僧僧子蘭詩疏鐘搖雨脚積雨浸雲容之句及讀相國陳公悔把吾廬寄杜城之言則又知華巖之為勝也酒闌過東閣閣以華巖有所蔽而登覽勝之真如塔在焉謂之東閣以西有華巖寺故也今為草堂別院

張注曰長安志曰真如塔在華巖寺今其塔在東閣法堂之北壁間二石記皆唐刻也且載華巖寺始末則華巖東閣本一寺也不知其後何以隸草堂焉下閣至澄襟院院引北巖泉水架竹落庭注石盆中瑩

徹可挹使人不覺頓忘俗意時子虛希古先歸院之東
元醫之居也予與明微宿焉

張注曰澄襟院唐左街僧錄徧覺大師智慧之塔院
也碑云起塔于萬年縣神禾鄉孫村今屬鴻固鄉元
醫世為樊川人其居北倚高坡泉聲泠泠竹陰相接
圃中植花穴洞巖閒架閣池上茂林修竹與之隱映
真有幽勝之趣續注曰澄襟院水久涸今為長老
濱巨源衣鉢院莊則金興定辛巳閒尚為元氏之居
遷徙後遂無聞焉近代李構卽莊建閣鑿洞立三清
像遂呼為三清閣兵後高竇老奉披雲真人爲十方
院門人樊忠高盡有元莊典刑雖在盛事則廢
辛亥厯廢延興寺過夏侯村王白二莊林泉
張注曰延興寺在楊萬坡斷碑遺址瓦礫徧地興廢
之由無可攷今爲里人劉氏所有竹木森蔚泉流清

淺景勝元醫之居但不葺治耳駙馬都尉王詵林泉
在延興寺之東與朝奉郎白序爲鄰王氏林泉久不
治白字聖均莊有揮金堂順年堂疑夢室醉吟菴翠
屏閣寒泉亭辛夷亭桂巖亭今爲王員外家所有
東次杜曲前瞻杜固盤桓移時

張注曰唐史稱杜正倫與城南諸杜素遠求通譜不
許銜之世傳杜固有王氣諸杜居之衣冠世美及正
倫執政建言鑿杜固通水以利人旣鑿川流如血閱
十日方止自是南杜稍不顯居杜固者謂之南杜以
北有杜曲故也杜固今謂之杜坡所鑿之處崖塹尚
存俗曰馬塨厓或曰鳳皇嘴不知何謂也杜氏世葬
少陵原司馬村之西南杜甫嘗稱杜曲諸生少陵野
老正謂杜曲少陵相近故也甫爲晉征南將軍預之
後預元孫某隨宋武帝南遷遂爲襄陽人甫曾祖某

為鞏令又徙河南宋孫洙為甫傳以牧之為甫族孫蓋同出于預也是甫乃城南諸杜之裔耳然唐宰相世系不載不知何故俟再考之

越姜保至興教寺上玉峰軒南望龍池廢寺

張注曰興教寺總章二年建有三藏元奘慈恩西明三塔寺倚北岡南對玉案峰元豐中知京兆龍圖李公登眺于斯命僧創軒是名玉峰擢萬年令陳正舉為之記龍池寺直玉案山之北續注曰興教寺開成四年沙門令總載修三藏塔銘屯田郎中兼侍御史劉軻撰慈恩塔銘太子左庶子御史中丞李去度撰西明塔銘貢士宋復撰三藏塔奠中差大右慈恩左西明差小殿字法制精密莊嚴

過塔院抵章趙覽牛相公樊鄉郊居

張注曰塔院者京兆開元寺福昌塔之莊也俗謂之

塔院修竹喬林森綠參天池臺廢基頗多不知在唐為誰氏業俗傳國初狂人李炎居之炎誅沒官後福昌塔成賜之為常住韋趙村有牛相僧孺郊居子孫尚有存者僧孺八世祖某隋封奇章公長安城南下杜樊鄉有賜田數頃書千卷僧孺居之依以為學後為相與李德裕相惡門生故吏各相為黨先是泚陟相德裕宅為玉盃僧孺宅為金杯且云金毀可作他器玉毀不復用矣其言果驗然唐史傳方技者不載其事其亦闕文意乎

迺登少陵原西過司馬村穿三像院尋舊路暮歸孫君中復之廬

張注曰長安志云少陵原南接中南山北直澆水本為鳳棲原漢許后葬少陵在司馬村之東因即其地呼少陵原杜牧之自志云葬少陵司馬村柳宗元志

伯姚墓曰葬萬年之少陵原實鳳棲原也原脈起自南山曲屈西北岡阜相連纍纍不斷凡五十里然則鳳棲少陵其實一本因地異名耳漢總謂之洪固原今萬年縣有洪固鄉司馬村今在長安城之東南少陵在村之東北則澹水在東非在北矣少陵東接豐梁原或作鳳涼原澹水出焉東北對白鹿原荆谷水出焉二水合流入渭杜甫詩所謂登高素澹原是也少陵之東岡下卽澹水之西岸其地有泉舊傳有犢跑鳴而泉出今謂之鳴犢鎮三像寺開元中建背倚北原高數百尺始寺依原刻三大佛故名又云開元末爲武惠妃建武氏墓在鳳棲原長興坊與寺亦相近中復田家子今爲進士

川之三渠醉還申店幾夜半矣

張注曰乾湫在神禾原皇甫村之東舊傳有龍移去南山炭谷原之湫水遂涸故謂之乾湫炭谷之水遂著靈異歷代崇爲太乙湫或曰炭谷本太乙谷土人語急連呼之耳續注曰塗山寺在皇甫村神禾原之東南舊傳皇甫村有三社曰鸞駕埤鳳皇臺及廢栖真觀翠微寺在終南山上本太和宮武德八年建貞觀十年廢廿年太宗厭禁內煩熱命將作大匠閻立本再葺改爲翠華宮元和元年廢爲翠微寺杜甫詩雲薄翠微寺則元和之前固已謂之寺矣百塔在梗梓谷口唐信行禪師塔院今謂之興教院唐裴行儉妻庫狄氏嘗讀信行集錄及歿遷窆于終南山鴟號堆信行塔之後由是異信行者往往歸葬于此今小塔纍纍相比因謂之百塔塔東爲石鼈谷廣惠神

祠在焉西爲豹林谷種放隱居之地放居今爲女冠
所有蘇季明松門亦在其西而董村者翠微寺下院
也又在其西自董村西行幾十里曰豐德寺豐德長
老所居今其寺猶有僧焉南五臺者曰觀音曰靈應
曰文殊曰普賢曰現身皆山峰卓立故名五臺圓光
寺王建集爲靈應臺寺陸長源辨疑志爲慧光寺韓
偓集爲神光寺今謂之圓光寺五臺之北有畱村數
寺皆下院也御宿川按揚雄傳曰武帝開上林南苑
至宜春鼎湖昆吾傍南山而西至長楊五柞北繞黃
山灑渭而東游觀則止宿其中故曰御宿大抵樊川
御宿皆上林苑地也
癸丑詣張思道循原而東詣蓮花洞經裴相舊居越幽
州莊上道安洞抵炭谷旣行小雨而還復尋會景堂清
談終日

張注曰思道唐學士驚之後居滴水之陰好讀書善
屬文雅麗有祖風自思道之居東行五六里直樊川
之上倚神禾原有洞曰蓮花舊爲村人鄭氏之業鄭
氏遠祖乾曜尚明皇之女臨晉公主杜甫詩有宴鄭
駙馬洞中云主家陰洞細煙霧疑卽此地也自洞東
行三四里爲唐裴相國郊居林泉之勝亦樊川之亞
今爲鄱陽沈思之居又南行三里至幽州莊李氏林
亭李氏燕人也故以幽州名泉竹之盛過沈莊矣南
行四里至道安洞今爲尼院院中起小塔西倚高崖
東眺樊南之景舉目可盡又南行七八里至炭谷自
谷口穿雲渡水躡亂石冒懸崖行十餘里數峰聳削
蹬道之半有司馬溫公隸書二十八字曰登山有道
徐行則不困擇平穩之地而置足則不跌人莫不知
之鮮能慎谷前太乙觀有希夷先生所撰碑觀南爲

故處士雷簡文隱居之地

甲寅北歸及內家橋子虛別焉予與明微自翠臺莊由
天門街上畢原西望三會寺定昆池池邈入明德門
張注曰內家橋今名也或曰雷家或曰能家皆姓也
橋之西又有沈家橋第五橋亦以姓名羅隱城南雜
感詩有賴家橋上潏河邊之句似當以能為是翠臺
莊不知其所以莊之前有南北大路俗曰天門界北
直京城之明德門皇城之朱雀門宮城之承天門則
界當為街俗呼之訛耳許渾有天門街望之詩可
據天門街當畢原之中長安志曰少陵原西入長安
縣界五里蓋畢原也志誤以為少陵西望三會寺
邊有大冢世傳為周穆王陵北有池舊與昆明池相
通唐為放生池有臺俗曰迦葉佛說法臺而傳記以
為蒼頡造書臺景龍中中宗幸三會寺與羣臣賦詩

上官婕妤所謂釋子談經處軒臣刻字畱是也定昆
池安樂公主之西莊也在京城之延平門外景龍初
命司農卿趙履溫將作少監楊務廉為園鑿沼延十
數里時號定昆中宗臨幸與羣臣賦詩
歷延祚光行道德永達四坊之地至崇業坊覽元都觀
之遺基過岡論唐昌觀故事

張注曰唐昌觀又曰唐興觀在安業坊元都觀北中
有玉蕊花元和中有仙子來觀嚴休父元稹輩俱有
倡和

既而北行數里入含光門而歸焉實閏月十六也
張注曰城南之景有聞其名而失其地者有具其名
得其地而不知其所以者有見于近世而未著于前
代者若牛頭寺碑陰記永清公主莊長安志載沙城
鎮薛據南山別業羅隱雜感詩有景星觀姚家圍葉

家林聞其名而失其地者也翠臺莊高望樓公主浮
圖溫國塔朱坡具其名得其地而不得其所以者也
楊舍人莊唯釋院神禾少陵兩原三清觀塗山寺陳
氏昆仲報德廬劉翔集之濛溪劉子哀之樊谿五臺
僧墳院見于近世而未著于前代者故皆略之以俟
再攷至于名蹟可據而暴于人之耳目者皆得以詳
書焉

游城南記一卷爲宋人所作記城南之景甚備中
承許少華先生手書予得觀于張華原兄之家甚
愛焉遂自錄一過後攷他書始得著述者姓氏明
微姓陳西楚人茂中姓張名禮澗右人博學好奇
有足多者斯記也屬詞考事詳矣哉予言夫宋去
唐未遠而風景池亭猶有存者今門坊之名亦漫
不可攷矣嗚呼滄桑易變陵谷難常後之游者其

將有取于斯文古稷齋小山道人康榕

光緒辛丑季冬江陰繆荃孫校正刊

據鞍錄

游城南記
游城南記
游城南記

游城南記

游城南記

游城南記

游城南記

據

鞞

鑠

據鞍錄

遼海楊應琚松門氏著

乾隆己未六月余時任西監司奉命輪流赴京引

見卽裝候代

六月二十日飯後長行兵民祖道東門外攀臥遮雷酒果雜陳馬不能步兩任湟中無寸長可錄祇自愧耳日昃始至平戎驛此地疑卽東漢所置安夷故城按水經注湟水經安夷縣故城北城有東西門去西平亭七十里殊相似也計程六十里二十一日五鼓行殘月在天山河闌寂六十里至碾伯縣卽唐之湟州古西戎地也因東路橋圯繞道出勝番溝經土司祁氏園林登樓小憩樹木陰翳溪流湍激涼

爽如秋五十里至老鴉驛見民刈麥籽粒肥滿婦子嬉
笑而雞犬鳴吠亦若助人忙云
二十二日黎明行(靈)邑夏禾尚青此地已築場矣河西
山高地寒雖刈穫有先後而歲止一收其民僑野質朴
湟中百十年閒所謂目不識鄉飲酒之禮耳未曾聞鹿
鳴之歌商賈多山陝人重利蕉剝百工稍精巧者亦他
產是以養生送死惟賴於農故民常苦貧辰刻行四十
里將次冰溝驛始見山巔有林木然亦無多如人仰臥
領下一二微髭也驛中旅舍甚卑隘多借民居以款冠
蓋與張令登高助興國寺浮屠於佛殿後起屋一區爲
往來休息之所寺近山雨晨月夕宛有幽致是日仍飯
於此飯已行一十餘里石壁彎環皴劈如畫前監司劉
公殿衡題曰大癡筆意隔溪可見渡河抵西大通城計
五十里接涼州郡屬平番縣界宋神宗熙(靈)閒王韶使

王厚收復河湟因大通河控扼夏境地形險要乃築塞
以制夏人卽此地也河源出塞外與湟水合注於黃河
水湍急終夜有聲

二十三日因通遠驛相距八十里四鼓遂行次驛食畢
又行四十里至平番縣經仁壽山寺閣屋椽高插絕頂
余曾一至其處今遙望之始知奇險之可慮也策馬過
莊浪河河水亦與黃河會入城酬酢甚繁平番本漢金
城屬國前涼張駿分置廣武郡隋開皇初郡廢爲廣武
縣元和志曰廣武縣至蘭州二百二十五里今路正相
等茲邑北徑五涼東連銀夏西達湟水南逼金城有新
舊城滿漢弁兵防守是夕避喧宿於距縣南十三里之
牧牛菴寺僧寂照人短小精悍寺無寸土可耕敝衣草
履而造屋數層厯階皆十餘級塏爽華潔尚興修未艾
惜乎畢生精力殫於土木俾爲士民(靈)非克家子耶鐘

聲悠然佛燈明滅遙憶慈幃路隔數千里坐久始睡
二十四日四更離寺朧朧月色中一路聞田水聲可喜
遂於馬背夢乘舟汎江湖驚寤幾墮馬始知夢寐乃觸
境而生也辰末次紅城驛已行七十里夾道皆水田並
渠多叢木高柳村舍錯置行者改觀然平邑供支甚夥
美田惟此一帶餘多係山坡荒野民以此苦之而往來
冠蓋不知也離縣城幾三十里道傍有清水一池經圍
數丈細泉上出如噴珠甘腴紺潔游魚鬣尾可指乃居
民棄諸路側飲牛羊而已悲夫自紅城至苦水驛五十
里苦水至皋蘭縣沙井驛七十里如由鹹水河一路則
近二十里是日住宿鹹水河南之哈家嘴焦土礮田漢
土居民廬二十餘家時隨行役夫告余曰此徑身自黃
口以至白髮行五六十年未曾一至苦水相較近遠不
過二十里而終身不由可知世人趨便之心亦如水之

就下不可強也地艱於泉過客俱飲澇池水澇池者掘
地爲凹以積雨雪人畜共之

二十五日蚤起五十里至沙井驛始見黃河沿河行或
近或遠抵金城關石岸夾東河如建瓴水經注云河水
自枹罕赤岸又東洮水注之又東過允吾縣南又東湟
水注之枹罕卽今河州地允吾讀如鉛牙其故城在今
皋蘭縣西關北有王保保城基卽元擴廓帖木兒據州
時築度舟梁登望河樓波濤澎湃甚可壯也土人以此
爲王將軍進寶渡河擊賊處非是將軍昔任西_寧總兵
官聞信由小徑星馳於河會城用皮囊渡河卽今張家
河灣距皋蘭一百一十里較大路近二日故迅速奏功
入城謁撫軍會司道府倅往還至二鼓始散府城距沙
井驛四十里

二十六日羣集於包觀察虞亭公署

二十七日

二十八日集臨洮道署較射看郭監司恬菴作大字絕不經意而結構適緊功力深厚所致也旋出城南游五泉寺寺在皋蘭山麓漢霍去病擊匈奴至皋蘭山下卽此山峻聳左右蜿蜒如張翼五泉自兩腋出雷奔雲洩匯流成渠自寺右山徑登閣凭闌俯視黃河如帶郡城樓櫓歷歷可數燈夕坐眺恍然赤霞自南郭外至山下四里水甘土肥園疇平衍東阡南陌路淨如掃春時梨杏甚盛白屋青帘人往來夕照中望之正如圖畫閣側有小屋一間窗戶洞開逼近左腋泉瀑下多亂石叢篠喬木雜生其閒自高而下每月夕來觀如造異境自閣右崖腹支徑側足登梯而上爲石佛殿皆依峭壁架空爲閣下卽右腋水泉佛像甚古年代不可考窮目更遠泉聲土射直入耳根炎夏坐久冷然善也主僧有田可

贍不來迎賓而遊人亦鮮至此

二十九日友人招飲於藩署卽邀徐方伯集功陪公雅量觴政肅然余幸射覆花連中未至汚裊晚驟雨卽止七月一日由南路臨洮行郡城諸君皆送至西郭外北路走金縣界較近余因臨洮爲先清端公舊治欲往一觀耳行二十里友人屠文山候於杏園樹下設瓜果話良久而別四十里至阿干峪居民皆以陶爲業牆角屋脊皆窳器焉徐方伯遣使饋餐又行三十里住摩雲嶺驛嶺矗入雲上有關今廢二日四更起畢宿下插路高下秉炬行至沙泥驛六十里再行五十里宿新店堡宋時爲河西路必爭之地沿途見洮水村民藉以灌田水經注洮水自狄道會大夏川水又北翼帶三水亂流北入河其桓水在洮州禹貢西傾因桓是來午飯日尚蚤閒步村外見赤雲如山

三日蚤行四十里至臨洮今爲州治郡守移於皋蘭州
仍屬焉秦始皇三十六年有十二人各長五丈足履六
尺見於臨洮以爲瑞魏正元二年王經與姜維戰於故
關原不利皆此地然古臨洮地廣新舊洮州皆是
國朝奮威將軍王進寶乘雪夜破臨洮父老猶能指示
其處有白髮者數人迎於馬首云皆親受先清端公恩
惠者入城住唐寶刹寺前明改爲圓通寺觀者如堵牆
笑曰此前郡守楊公孫也少憩出東門登鳳臺謁楊忠
愍公祠壁上詩詞甚夥亦有先清端公題榜并手植稚
松今已徑圍尺餘矣側又有雙忠祠奉鄒蘭谷張舜卿
兩先生木主亦有先清端公題額蘭谷先生劾嚴世蕃
一疏已彰彰在人耳目至舜卿先生救忠愍公之疏有
云朝士多慨忠冤未伸權貴陷阱孤臣之由控訴無門
又曰權貴一朝可肆四海是非公道難移不愧爲忠愍

公同年友矣先生卽狄道人名萬紀任吏科時彈嚴黨
郡守尹耕并疏銓法乖謬其爲給事中也值明世宗建
醮西城先生執不進香廷杖臀肉盡落因疏理忠愍公
冤擠陷外補後以星變考察奪職歸家奉親九薦不起
著有超然山人集讓學語錄忠愍公遇害狄道士庶設
像祀建超然書院今壁間尚有舜卿先生哭公詩嗚呼
其痛心爲何如亦可謂死者反生者不愧乎其言矣
回寓往拜州牧仍居舊府署堂宇闕壯庭槐數百年物
扁額皆先清端公所書隨侍老僕一一爲余指告瞻溯
久之出赴北極觀看古石碑碑高二丈廣六尺厚如廣
之半岌岌欲墜字皆剝蝕詢諸土人曰故老相傳文皆
隸書額刊獸物趺列怪形乃唐西平王李晟平定羌戎
所建然亦無可考也訪城西西湖已塞爲平土唐岑參
臨洮汎舟詩有池上風回舫橋西雨過城之句今洮水

橋在城西想水有遷移耳秦築長城亭障壑山堙谷通
直道延袤萬里始於此地至今有遺址可望王翰長城
吟云迴來飲馬長城窟長城道傍多白骨問之耆老何
代人云是秦王築城卒哀哉始皇不足論蒙恬乃秦世
臣名將而阿意興工輕視民力兄弟卒不免於誅何哉
四日行五里過東峪河水亦入洮殆卽酈注所謂翼帶
二水者歟至窰店驛六十里居民廬數十家亦無店肆
飯於官廨上漏旁穿又行五十里抵烏鼠山下山海經
云茲山其陽多金其陰多玉其土多丹雘爾雅云其鳥
名餘其鼠名蹠郭璞曰餘似鷄而小黃黑色蹠如人家
鼠而短尾孔安國書傳烏鼠共爲雌雄同穴處此山遂
名漢地理志首陽縣有烏鼠同穴山細詢土人云相傳
穴入地三四尺鼠在內鳥在外各自生育不相侵害較
前說近理禹貢導渭自烏鼠同穴水經注渭水出南谷

今審源流渭水本出南谷山在渭源縣西二十五里
至烏鼠山導而東轉耳首陽縣卽渭源漢時舊名又行
十里至縣城渭源堡在縣西北岡上三百步許宋王韶
屯兵處城內居民廬數百家蓋屋皆以亂石壓木片廬
蔽風雨板屋之故俗也蔬菜俱無彫敗可念
五日雞三號起行五十里至熟羊城城約二里餘四圍
尚壁立宋皇祐初所築以其功速謂之熟羊城如羊熟
而城就也郡志爲首陽鎮因縣名也縣志云康熙二十
七年六月熟羊城一帶有五色雲降於草木雲可手掬
以口吹之牆壁爛然可觀踰時方散又行四十里至鞏
昌府是日常涉渭水近城仰見仁壽山樓閣金碧參差
可喜入城酬酢冠帶移時住萬壽寺東向一殿甚雄相
傳唐時所建了無碑碣可考餘地皆眾僧割據造屋取
贏守爲世業謂之房頭亦可笑也鞏昌秦時之隴西漢

時之天水南安古今大郡也
國朝順治五年夏四月逆回米刺印等攻陷臨洮州縣
進至鞏昌叛回應之總督孟公喬芳聞報遣馬_靈張勇
帥五百騎銜枚疾走乘夜至城下襲營賊驚擾自相擊
殺死屍枕藉遂平之康熙十三年冬十月提督王輔臣
叛遣偽總兵朱龍陳可鄭元經王有祿入城據守搜括
無遺分鈔旁邑十四年閏五月靖逆侯張公勇將軍穆
公成格巡撫華公善總兵孫公思克合兵討賊圍城兩
月猶虞士民無辜橫罹鋒鏑不忍急攻屢使人招降賊
疑不敢出乃遣前邑令陳轅來撫民胥納款賊不得已
乃降六月二十八日開鎮羌門迎侯自是後
國家培養六十餘年已漸致蕃庶然樓櫓殘缺墉垣圯
損終不及往時云穆將軍人稱爲細狗將軍者是也將
軍驍勇無倫比性喜田犬雖矢石如雨之際牽挽撫弄

亦不離左右云隴西爲鞏屬首邑漢書云隴西山多林
木民以板爲室屋至今猶然民俗好稼穡水草宜畜牧
隴邑有耕天村其田曰雲下田古諺云即樞女樞十馬
九駒安陽大角十牛九犢其宜畜牧可知也李賀故里
在城南二里袁家坪是日立秋
六日飯於四十里鋪之官廡屋梁將傾以一木支之可
危行十里至沙灣有大碑一白潔細潤非近山產也但
塵埋已久塵餘額篆乃元太師鞏昌安懿王完澤墓碑
也又行十里至廣吳山下宋所置廣吳城猶有遺址廣
吳河繞其下流入渭山斗峻上下五里又二十里至_靈
遠縣宿始見稻田一路聞鶯聲
七日蚤行明星未落日腳漸紅渭水屏山時隱時見客
人自以爲蚤而村農驅牛入田矣間種冬麥河西地寒
惟種春麥暨燕麥草飼馬最宜此一帶又有玉麥

然二種皆係秋田色味亦遜麥之支庶也三十里次落
門鎮卽古落門聚漢建武十年來歙攻降隗純三國時
姜維攻狄道至落門引還唐吐蕃得洛門守之洛門卽
落門也東達秦階南通漢中乃扼要之區居民有五百
餘戶飯罷行夾道柳陰鳥聲斷續村園綠竹數竿搖曳
牆外九年塵土見此風味悵然不勝故鄉之思經永靈
城宋崇寧三年置縣金爲寨元省永靈河繞其下水亦
入渭據高臨流圍垣半缺半存仰望塵有廟屋而已至
朱圉山色如馬肝禹貢朱圉卽此距伏羌縣二十里涉
渭河二次水幾至馬腹又經大象山距縣五里宋嘉祐
四年鑿大佛像於峭壁長十餘丈覆以樓七層左側穿
洞道以通餘處惟飛鳥可到相傳茲山上有隗囂歇涼
亭云至縣不入城宿三官廟距落門計程七十里有漢
平襄侯姜維故里碑墓亦在境內渭水在縣北一里東

北流入秦安縣界自水發於渭源經隴西靈遠伏羌諸
邑漑田轉磴無不賴焉起於彼而利於此亦事有固然
者是日始食稻糧晚頗熱蠅漸多可厭攜筯坐寺後空
院呼寺僧問詰朝途程指曰公背後山徑是也望之屈
曲極高

八日過沙石坡至巔二十里然土肥可耕山田青黃錯
雜野花紅紫相閒殊可觀每於山缺處又時見渭水下
坡二十里至關子鎮屋瓦望若鱗次自此居民皆瓦屋
矣然止用仰瓦不施合瓦尚從儉耳大都五方風俗語
音始猶以漸而更終則判然各別亦如天之四時潛移
默運寒暑遂至迥異有不知其所以然者午後遇大雨
忽晴忽陰山色蒼茫可畫六十里入伏羲城謁伏羲廟
殿宇雄深惜歲久傾圮古木往往數百年物李州牧鎡
捐俸葺理碑碣屢經兵火秦人亦不知珍重惜無元代

以上者是日借寓胡副憲麟徵居第叢竹片石頗雅潔
秦州古成紀地隴蜀會區也長接五城土人謂之木筏
城東西關城乃宋守臣韓魏公琦於慶曆二年築以捍
民故又稱爲魏公城出城將謁漢將軍李廣墓奈日已
沈山遙望隱然莽起者卽墓也後負三台山前臨藉水
徙倚久之土人言墓側有石馬土埋及背故呼爲石馬
坪尚有子孫每歲來此拜掃云歸來已昏黑欲詢
國朝秦隴遺事訪有老革孟芝蘭年九十餘坐問良久
據云康熙十三年吳逆僞總兵陸道清入城據守
王師攻圍至五月賊力不能支乘夜鼠竄我兵追斬殆
盡又賊盤踞遠落門鎮暨西和禮徽成諸縣揚威將
軍阿公振武將軍馮公老革遺忘其名張靖逆侯勇王
總兵官進寶統滿漢兵數萬雲屯秦郊以次勦滅且能
言諸將軍之形貌性情歷歷如繪至士女所罹鋒鏑之

苦將卒餐冰飲血之艱不禁淚下始見蚊夜雨

九日往遊天靖山玉泉觀元時建距城三里許李牧候
於觀門門東向徑長數十武北界溝水南崖如削上有
盤根古柏甚多皆南生北向枝葉橫垂人行其下不見
日色觀三層階高數十級均南向溝覆有橋因折而北
覆以瓦舫前制軍孟公喬芳有陸海虛舟題榜四字孟
公蒞任於

國初撫定三秦規取全蜀流寇餘孽與夫叛回晉賊次
第翦除厥功茂矣且張侯勇趙將軍良棟等皆出其麾
下薦才爲

國旣得其力於

定鼎之時迨吳逆鼓亂復收其功於二三十載之後嗚
呼爲大臣者之所以貴進賢也過橋拾級而上有元碑
四面書字石堅白如玉扣之有聲左旋至三清殿側有

射圃頗廠豁右旋爲諸葛忠武公祠再折爲大雅堂奉
李杜兩先生像有趙松雪字刻四碑筆力雅健石堅細
旁無花草闌界除書字處餘不琢磨長短寬狹亦不一
可知古人用意不在彼不在此下爲選勝亭俯視秦城人
物草木可數遠屬清渭明滅林端望南山寺煙樹茂鬱
下臨藉水卽少陵詩所謂老樹空庭得清渠一邑傳者
天靖山秦之北山觀東有王基城卽隗囂宮也土人常
掘得磁器極古多豆綠色觀前後柏檜皆數百年物又
有玉泉水可飲杜詩所謂秦州城北寺傳是隗囂宮者
或卽此地觀屋宇朽敗李牧親爲經營而修葺之工頗
費下山東行三十里徑馬跑泉少憩短籬竹屋鵝鴨浮
沈溪水中高柳外青青稻田殊似江南風景又行十餘
里過東柯谷口州吏目鄭重蒞秦州二十年屢至東柯
爲余言之甚詳大都崖谷幽邃泉石噴薄竹木栗稻瓜

果之盛與少陵秦州雜詩所詠無異惟是草堂遺址泯
滅可憾舉鞭引領怒焉久之臨渭河波瀾洶湧用方舟
始可濟非復前日之涓涓矣所謂有本而不息受下流
多故也又過牛頭河水亦入渭次社樹坪距州五十里
借宿道院月上坐院門古柳侵雲蟲聲如雨不知身之
在何境也

十日踰丁華嶺至巔遙望石門山碧峰巉絕直插雲表
數十里外望之嵐光逼人連山聞有仙人崖三峰並列
萬山環繞如繚桓中有古柏甘泉唐建僧寺又有麥積
崖壁立千仞穴石插木盤旋而上其洞宇佛像物類皆
鑿石爲之蹈虛架空下臨無地神功鬼斧極其奇巧人
登其上丹碧玲瓏飄飄乎有凌雲之意秦文公墓在其
下崖之北曰雕窠谷瀑布水甚壯上有隗囂避暑宮云
飯於草圍鋪計程四十里又行四十里抵清水縣宿邑

西有清水河本秦武公伐邽戎置上邽地漢武帝更名
清水後漢建興九年丞相亮逆司馬懿於上邽懿依險
兵不得交亮引還唐建中四年隴右節度使張鑑與吐
蕃尚統質盟於清水皆此地也漢壯侯趙充國墓在集
翅山下距縣八里日落不能去其墓表乃漢馮奉世所
撰今已不復存矣借宿兩銘書院空庭老樹坐月甚涼
十一日蚤行道傍多種麻蓬蓬鬱鬱二十餘里至湯峪
距二里許有溫冷泉溫可浴身冷可漱齒二脈並出相
距五步亦可異也三十里至白沙鎮卽古秦亭晉時建
義熙六年赫連勃勃攻白沙卽此地飯於楊姓太學生
書室牆下皆種十丈紅其細者頗似木芙蓉豔色可愛
又行四十里逕盤龍山有大震關卽唐廣德元年秋七
月吐蕃入大震關陷岷秦成渭等十州盡取河西隴右
地卽此關也山椒漸多林木道傍時有流水聲又行二

十里住長盩驛距驛二三里兩阜如牛角對插中有溪
水流出疑無去路沿溪入角始望見人家後依大隴卽
關山也是晚月色朦朧溪聲嗚咽獨坐思親涕零雙墮
一夕目不交睫唐羅隱關山詩云何計謝潺湲一宵空
不寐實獲我心

十二日過關山峻阻盤折而登林木叢茂樺柞尤多
人行不見日色溪澗重密皆覆以板橋翼以扶闌以通
行旅水流已急而四山泉瀑乍大乍小穿林越峽奮湧
揚波而來溪聲益壯登頓洄沿雖馬行甚艱睹此拄策
不能捨去始見有結茅而居者岑參關山詩云牛羊入
青巘雞犬宿蒼煙形容之妙至今猶然上下八十里至
咸宜關秦鳳要隘有游擊官統兵防守焉關山非隴山
也隴山在州西北六十里一名隴坂三秦記云其坂九
迴不知高幾許欲上者七日乃越關山在州西上下止

八十里耳隴關在隴山三秦東曰函谷西曰隴關二關之閒謂之關中過山行四十里至隴州歷代沿革不一本周岐隴地漢屬右扶風西魏改爲隴州後雖有興廢名自此始所謂秦之西門也城中亦寥落有種稻者訪之遺老云前明時遭流寇蹂躪我

朝康熙十三年吳逆變亂僞總兵蔡元攻圍城陷執官脅民貝勒率穆將軍至賊眾引卻依山據險我兵奮擊至夜元度不能勝引賊遁

王師過關李黃鶯復踞山伐樹塞路我兵屯咸宜關相持日久不能取三年之閒田土荒蕪後始擒勦民得更生喜

國家無事六十餘載今漸成聚落云是日秋暑熱甚攜扇去場圃坐碌碡上與老農閒話風來滿鼻稻梁香衣袂如洗候至月上始歸

十三日黎明行出州南門二里過沂河水至馬膝河出岍山卽禹貢導岍及岐是也隴州諸水會於沂沂水復南至寶雞縣邸店入於渭渭水又入於河所謂殊途同歸也西陲地高多山千流萬派無江海可歸故皆會於黃河而層巒疊嶂河亦束縛不能張其勢故銀夏諸處尚資其灌溉而受其益至入中原地平如掌河已屈伏萬餘里從此暢流奔放亦勢所必至者又行數里雲氣開朗有奇峰如人掌高指碧空形勢秀拔詢之乃吳嶽也周禮山鎮曰嶽爾雅以此爲河西鎮山海經云吳山之峰秀出雲霄山頂相捍望之常有落勢杜氏通典曰五嶽四鎮四海四瀆年別一祭蓋吳山位於西方故曰西鎮實西北諸山之綱紀眾水之統宗宜乎與太華相伯仲而享明禋也杜少陵詩云昨憶踰隴坂高秋祀吳嶽東笑蓮花卑北知崆峒薄可以信茲山之峯律矣隴

境內又有魚龍川源出小龍山水東北流中有五色魚人不能取少陵秦州雜詩遲迴度隴怯浩蕩及關愁水落魚龍夜山空鳥鼠秋魚龍夜人以為汎言耳不知古人一字必有本如此五十里至草壁鎮謁唐段太尉祠徧閱已無舊碑有一石載云柳柳州集中段太尉逸事狀在汧西安化碑上係唐憲宗九年曹禎篆立今碑破壞不全邑侯王君建祠塑像取安化逸事碑一塊埋於此石之前深尺餘使不遺墜太尉父墓在汧陽境內四十里至汧陽縣古隴糜縣也昔尚有汧陰今并入隴州蓋以汧水分南北也又行二十里至黃里鋪宿是日道傍官柳閒始聞蟬聲旅店頗狹熱甚揮扇竟夕十四日行五十里至鳳翔府鳳翔秦內史漢三輔地也唐肅宗以為西京代宗又以為西都歷朝稱重地焉今城中亦頗落窳聞秦穆公墓即在城隅東坡先生秦穆

公墓詩云橐泉在城東墓在城中無百步乃知昔未有此城秦人以泉識公墓惟是三良沒已久遠道路之口至今猶似有餘哀也東坡先生凌虛臺記在府治後堂壁喜雨亭在署內徑東湖口湖側有先生祠憶弟子由詩聞刻於祠壁主僧封閉下馬瞻湖第見蕞爾湖光殘荷一片衰柳數十株而已苦無旅舍飯於城外河側小寺河名左陽水水經注所謂北出左陽溪徑岐州城西又南流注於雍水是也寺內蕭蕭如古驛無僧寺側主有塔寺河橋碑記乃

國朝康熙十八年少保總督山陝軍務李公國英提兵入蜀時率屬修成者溯自湟中抵此皆傍夾兩山是日馬首東望無際眼目為之一新始見高輪大車望岐山經鳳鳴岡韓昌黎先生岐下詩云丹穴五色羽其名為鳳凰昔周有盛德此鳥鳴高岡古之聖賢未有如周之

萃於一門者今得親至岐下徘徊山隰誦瓜瓞之詩歌
關雎之章嗚呼盛哉五十里抵岐山縣駐馬四顧太白
峙於前天柱聳於後南滎渭水東繞潢河田野膏沃民
務本業有先王之遺風焉天柱山距縣十里潢河亦與
他水匯入渭訪古碑謁有周公祠唐節度使崔珙進靈
泉圖并題奏狀及勅批答碑祠在縣西北鳳鳴山下得
墨榻一紙字尚完好東坡先生詩云吾今那得夢周公
尚喜秋來過故宮卽此祠也大雨移時止宿察院地勢
塏爽庭垣新聖有綠竹二叢高出牆外時霽月皎潔四
無人聲是夕寢食俱有味

十五日四更行月明如晝遙望太白山積雪未消若玉
屏南障諺云武功太白去天三百其巉嶮可知聞上有
神湫三水清鑿毛髮無寸草點塵且能出雲爲風雨見
怪物亦山之奇特者南望五丈原云距縣五十里上有

諸葛忠武公祠是刻皓月雲掩秋風颯然童子忽朗誦
忠武公前後出師二表令人南向不樂駐馬良久廿里
至龍尾鎮唐鳳翔節度使鄭畋曾於此地遣唐弘夫伏
兵擊黃巢於龍尾坡斬首二萬級賊不敢窺西京過周
原聞連互數縣詩所謂周原膺膺者是也問梁山太公
遷岐所踰處土人云距縣東北七十里卽秦梁山宮也
入扶風界唐貞觀八年始以扶風名縣疆域塵延六十
五里袤百里有奇而已過漢伏波將軍馬援墓距縣西
七里餘近村多馬姓人傳卽其子孫云六十里至縣問
郿城在縣東南三十五里有姜嫄廟入城游龍光寺唐
開元二十八年建原碑已斷今失其半出縣東門過漆
水水與漳水會而入於渭望飛鳳山卽在漳水南昔有
亭榜曰遠愛今不存卽蘇詩所謂遠望若可愛朱闌碧
瓦溝也至詢唐法門寺土人云縣治已移今寺在縣北

崇正鎮漢爲美田縣唐憲宗迎佛骨於此寺昔係木塔
四層唐龍朔大曆天復之間相繼勅修賀蘭之張或薛
昌序俱奉勅撰碑銘元和十四年功德使上言法門寺
塔葬佛指骨卅年一開則歲豐人安來年應開請迎之
帝從其言遣中使迎佛骨至京師畱禁中二月乃歷送
諸寺開成之年又言五色雲現因改名法雲天復中仍
舊名明隆慶閒木塔崩啟其藏視之下深數丈金碧輝
煌以水銀爲池汎金船於上內有匣貯佛中指門旁金
袈裟尚在萬曆七年里人楊禹臣等重建塼塔十三級
至二十七年始工竣今寺內有韓文公祠異端正學不
兩立乃後人獨喜調停而並存之可笑多此類也徑漢
班孟堅墓下馬瞻拜冢前有石獸二羊二石几一墓木
無拱把者五十里抵武功縣瞻拜張橫渠先生祠堂自
鳳翔東至青門在在皆有祠宇關中之學昔日入人之

深可知也入城謁前明康對山先生祠堂公肆力文章
臚唱第一武宗時上萬言書極諫卓犖不羣頗鬱時望
權璫劉瑾以同鄉才賢欲誘致爲重公義不屈時李夢
陽以代草劾瑾疏觸怒下獄計非公莫解獄中出五六
紙求公公念良友不得已往見瑾竟喜不自意出夢陽
於獄使人以吏部侍郎鈞公公以死拒之瑾復大恨後
瑾敗乃終以往見誣罷於是林居四十年以山水詩酒
自娛晏如也營澣西別業讀書其中有楊侍郎過訪畱
飲甚歡自起彈琵琶勸酒楊云家兄在內閣殊相念何
不以尺書通問先生面赤毗裂擲琵琶撞之追而罵曰
吾豈效王維假作伶人討官做耶今觀其遺像誠英偉
人也出城北門謁唐太宗祠前爲鴻禧觀庭中古柏數
十本後殿設太宗像日角虬髯黃袍玉帶凜凜如生兩
粉壁左繪麟閣勳臣右繪瀛臺學士於笏上各標姓氏

趙起彬彬師師濟濟想見一時君臣之盛簷下有古碑
刻唐貞觀六年太宗幸慈德寺舊宅四韻詩有云前池
消舊水昔樹發今花又云一朝離此地四海遂成家後
刊太宗重幸故宅詩有云粵予承累聖懸弧亦在茲又
云共樂還讌歡此大風詩按唐書太宗本紀太宗以
隋開皇十八年十二月戊午生於武功之別館有二龍
戲門外三日而去卽此邑也碑未有前平陽通判隴西
郡開國子食邑五百戶賜紫李文本跋云住持沙門子
益見縣令盧振處有天聖中宰公种世衡石刻二詩恐
字畫損復刻云碑石堅細惜跌非舊物碑亦敲傾恐十
數年後又爲階下石矣日莫猶舉火周視階前有巨碑
臥泥土上字已擊損其視不明者余用指摩驗踰時始
知宋直龍圖閣邑人游師雄初建唐太宗祠碑慈德寺
昔爲慶善宮神堯之舊宅也惟碑內敘寺在城南今在

城北詢老生閱前舊碑側小跋乃知谷口鎮爲舊邑因
水患將此祠材木並舊碑悉輦來置此故碑跌不稱唐
太穆皇后卽邑人竇毅之女毅隋開皇初拜定州總管
唐武德元年贈司空杞國公隋文帝受周禪后尚在閨
閣聞之自投堂下撫膺太息曰恨我不爲男子救舅氏
之患按唐書后文有雅體又善書與高祖書相雜人不
識也閨壺而具文武之略異哉道士延至前柏下坐良
久行時月輪初升光正望於是夜如紫金盆推擁而上
抵寓一鼓盡席地對月而睡似濯魄冰壺中也
十六日黎明行一路皆太白山色五十里至東扶風又
行二十里次馬嵬坡唐楊妃墓在焉一抔黃土亦無草
木有碑臥地乃王阮亭先生詩刻也內云一種傾城好
顏色茂陵終傍李夫人至此方知斯句之妙稍東北黃
山麓卽馬嵬道院妃賜死處有明皇手植槐土人呼爲

太上槐泉聲樹色增惆悵焉太真墓詩古今最多遼時有詔錄太真墓詩得五百餘首付詞臣第之今志內所集寥寥數首而已又行三十里抵興平縣熱甚借宿道院坐大樹下月上始入室一夕猶數起焉回憶湟中長夏不揮扇夜間皆覆絮衾若沈陰積雨南山數峰猶有新雪避暑之妙可甲天下

十七日夙興詢漢武帝茂陵徑路行由東北折地勢劇高遙望巋然一小山也十七里至陵下方形四角稜起高一十四丈方一百四十步按茂陵徙民置縣至萬餘戶陵縣屬太常不隸郡今絕無一物前有古柏一株冢上茸茸細草微風動搖而已陵北遙見九巖山其最高峰卽唐太宗昭陵三面峭削陵置巔頂陪葬長沙公主等墓二十有一妃嬪韋氏等墓八宰相馬周等墓十有二丞郎三品唐儉李大亮等墓五十三功臣大將軍以

下尉遲敬德秦叔寶等墓六十有三至今猶存石屋三楹六駿列於左右貞觀中擒服諸番君長頡利等十四人石像尚在陵北司馬門內太宗英邁事事欲勝人而陵墓亦不同如此李夫人墓距茂陵西北一里東西五十步高八丈形如陵側二里有二冢高十餘丈不方不圓類山形者必漢將軍衛青霍去病墓當起冢時武帝發屬國軍一象廬山一象祁連山云明方正學先生弔茂陵文云慨雄心之靡託兮悲曼志之無成又云後宮之韶冶兮塵或傳其冢墓像祁連以旌武兮想壯魄之已腐可謂極形容之妙自陵遞池而下由槐里故城入大道故城卽秦之廢邱章邯爲雍王時所都漢更名槐里是也自興平至咸陽縣五十里由陵路則多行十餘里矣是日次旅舍尚早沐浴往謁周諸陵出縣北門數里卽畢郢原也原上大冢極多纍纍滿目惜無寸

碣可者周秦漢唐以來得附葬此原者類皆外戚勳臣而犁鋤之下今不知削平幾許乃田父野老不以踐蹋爲懷而猶以有礙耕耘爲苦檀弓成子高云吾縱生無益於人吾可以死害於人乎哉吾死則擇不食之地而葬我焉知言哉行十五里至文王陵南向後倚嵯峨前臨渭水面對終南氣象萬千陵高四丈餘東西長二十一丈南北二十六丈有前明洪武以後祭碑然惟國朝

列聖祭碑爲多武王陵在文陵後相距止三十九丈陵高七尺東西長十五丈南北如東西增一丈二陵古柏九十六株如虯如蛇文陵上生四株共百株成王陵距文陵西南三里許高五丈南北長十九丈東西長二十丈有古柏十株康王陵在文陵東南相距四里許東西長二十三丈南北如東西長減二丈陵高四丈有古柏

十二株地勢高於成陵俯見渭水二陵亦皆南向文陵形方武陵形圓康陵形長不似漢諸陵皆一律也方形類鼎圓形類鐘長形類臥圭古人非有意而爲所謂不期然而然者周公墓在文陵東三里許高三丈魯公墓在周公墓後有古柏二十五株千餘年物也內枯三株亦頗有致周室開基八百年聖聖相承至今畢原之上祖孫父子兄弟陵墓相望如聚一堂皆血食萬載樵牧自禁可謂極盛矣成康陵側各有漢陵一其高大如茂陵無石可考周圍有垣基童子牧羊於上土人相傳昔年避亂築牆暫居於此云按咸陽之名三輔黃圖云山南曰陽水北曰陽其地在九嶼山南渭水北山水皆陽故曰咸陽亦妙解也

十八日五鼓行出城東門數武卽渭水古渡登舟月白如畫終南對列如屏賈客艫船集岸下如雁行影落水

中搖曳不已。鐙火明滅，渭城女牆隱見，樓櫓參差，嘔軋中流，涼風滿袖，信可樂也。舟人指示北坂，按始皇初諸廟及章臺上林，皆在渭南，自破滅諸侯，寫倣其宮室，作於咸陽北坂上，南臨渭水，自雍門以東，殿屋複道，周閣相屬，所得諸侯美人鐘鼓，以充入之。而今安在哉？過渭三里，度澧水橋，自咸陽至西安省五十里，城中分隸長安咸寧二邑。長安漢縣名，咸寧唐縣名也。城八水交匯，面臨終南，隋唐故都規模雄偉，城池官署國朝俱因明之舊。割東北一角，暨南城四分之一，為滿城，設重兵駐防，冠蓋繽紛，車馬絡繹，非他省可望。夜宿滿城，妻兄李仲英家，握別九年，去時童稚，皆已長成，呼鐙烹茗，相對惘然。

十九日謁制軍陝西撫軍答拜，諸執事熱甚，流汗竟日。二十日往觀西安府學古碑林，立學基，卽唐之國子監。開成中所鐫石經存焉。按唐史，文宗時鄭覃與周墀等校定九經文字，上石及覃以宰相兼祭酒，於是進石壁九經一百六十卷，分列左右，爛然盈目，惜碑多斷裂，恐難延久。中爲唐元宗所注孝經碑四石，合爲方形，總覆一頂，上出亂石如峰，後列唐宋元明並國朝碑，更僕難數。唐碑多有移諸他處者，立法甚善。蓋鄉村有一名碑，卽增一累，往來冠蓋暨諸當道，識與不識，皆索取墨搨，呵叱擾攘，雞犬不得。每至碑，什字滅而後已，比比皆然。今移諸府學萃于一堂，而假此市鬻以養生者，必珍惜諸碑，而不肯毀兩全之道也。碑多不能悉記，如世之共傳爲名碑者，唐虞世南所書孔子廟堂碑，顏真卿所書多寶塔感應碑，顏惟貞家廟碑，李陽冰篆額，併爭座位書，臺柳公權所書尚書馮宿碑，元祕塔碑，徐浩所書不空禪師碑，歐陽詢所書皇甫誕碑，歐

陽通所書道因禪師碑史惟則所書大智禪師碑張旭斷碑千文肚痛帖草書心經懷素藏真律公帖聖母帖草書千文并題名石柱後先環立揭聲丁丁宋以後碑碣尤多觀者如入海藏精光奪目應接不暇真巨觀也二十二日自南城長行此地名胭脂坡詢漢江都相董仲舒墓云卽在滿城外往謁拜樹木交蔭祠宇嚴整非先生之墓豈能留至今日按李肇國史補云昔漢武帝幸芙蓉園卽秦之宜春苑也每至此墓下馬時人謂之下馬陵遂出南門城南近終南山有樊川御宿諸水漢唐以來苑囿池館櫛比星連今皆湮沒無所考求南走望薦福寺小雁塔隨問隨行直抵牛頭寺坡下是日訂次臨潼只得悵然而返過慈恩寺按懶真子云寺塔有唐新進士題石雖妍媸不同皆高古有法宣和初本路漕柳城集而刻之今俱蕩然無遺惟前明題名碑尚存

無可觀者塔下觀唐褚遂良永徽四年所書聖教序並記分刻二碑置於東西兩龕石如墨玉書法道逸摩娑久之登塔望曲江池無涓滴水卽細柳新蒲亦掃地盡矣唐人登塔留題之詩並無寸石韋曲塵有民居樂游原隱然墳起而已倚塔四顧秋風滿懷不勝黍離麥秀之感下塔行過澹水又過灞河不特無橋亦無寸柳更覺黯然行四十里至臨潼縣往觀溫泉宿於泉側寺屋寺僧飲食沐浴皆取於此泉味甘潔餘流灌溉園蔬生發早他處兩月寒冬卽有新韭寺內左右皆湯池主僕擇池而沐起立頓覺身輕似可御風而行蠲垢養和此語不虛夜大雨

二十三日阻雨不行仰觀驪山松雲掩映溫泉騰沸滿室陽春几凳淨拭焚香展卷清閒竟日可謂客中之奇遇也飯後雨稍霽觀華清宮舊址已爲道觀但仍顏舊

額屋宇傾圯門常封閉按唐天寶六年始築羅城於湯
所置百司公卿邸第治湯爲池沼增起臺殿環列山谷
改溫泉宮爲華清宮殿曰九龍以待上浴曰飛霜以奉
御寢曰長生以備齋祀其他殿閣樓觀不可勝數改觀
始於天福中曰靈泉觀以賜道士宋元明因之今華清
宮內止有元中統二年商挺碑記餘無存宮東有小石
碑字漫滅不可識據土人云碑側卽妃子蓮花湯今已
土平無可考微雨乘興登驪山自繡嶺而上十九折至
山椒兩嶺皆柏木自下仰視不過細支蒙絡至其上摩
觀往往皆數百年物奇古可愛經老氏宮抵驪山老母
廟一帶皆朝元閣故址北瞰清渭南臨商於往來行人
憧憧如織而山後阿澗閒瓦屋鱗次多有居民巖谷清
空犬聲如豹想紅樓綠閣最勝之時又未必有此景物
也雨漸大雲氣四塞愴惶而歸衣履盡溼寢時與僮僕

約五鼓起行及寤日杲杲出矣

二十四日行十七里道側南原卽古鴻門下馬徘徊干
載下猶爲沛公危也過新豐市想昔日之盛又三十里
次靈口舊有題蘭相如墓詩云當年身壁俱歸趙肯占
强秦土一抔所過道傍相如墓碑之誤無疑陰雨又行
四十里徑漕水萬里橋抵渭南縣漕水亦北入渭雨甫
晴日色尚早仍出城登萬里橋閒眺見蒼鷹數十摩空
而飛白鷺一雙對立沙際動靜各自適也

二十五日早行十里經唐太師王忠嗣墓道墓前神道
碑元載撰王縉書用筆勁秀有法萬曆中已移置縣西
郭門外又行三十里過西溪水此一帶皆少華山色遙
映樹杪山亦巖嶙及視太華山則似兒孫矣西溪余曾
至其處山水彎環荷花極盛遙望如依依故人云又十
里抵華州出東門華州前爲直隸州今同州升爲府屬

焉過太平橋有宋希夷先生墮驢處碑碣過漢將軍紀
信祠堂又行二十五里經蓮花寺面臨少華後負平阜
有清池叢葦映帶左右樹木茂鬱地多凸凹棄石壘
酷似前人營造亭池之處土人云郭令公本華州人此
其故園後改爲寺按汾陽園在長安大安坊後爲岐陽
公主別館豈此地亦有別業耶又行五里次柳子鎮飯
已卽行太華三峰如半天之雲岌岌欲墜馬行其下秀
色巒光令人神爽飛越余於九年前渡河西來與友人
屠文山約游西嶽至青柯坪文山有疾余獨至雲臺峰
記憶文山迅返因未登峰頂至今猶以爲憾事然所歷
之徑道尚能敘其梗概焉嶽廟至雲臺觀十里雲臺至
玉泉院一里有希夷洞設先生睡像洞左有山菴亭覆
盤石上玉泉環流灌木四合真佳境也東南行始入谷
口兩壁直立如削谷底寬者止二三尋溪水透迤而出

五里至第一關巨石突立中豁爲門人尙僂而上若行
隧道桃林坪卽在關上取昔放牛桃林之意登坪山色
四圍溪聲聒耳已別有天地矣行四里次方洞石崖百
餘尺有穴名希夷峽相傳蛻骨在焉西折數十步有石
中分如斧劈者人由此內行爲第二關又行數里至娑
羅坪谷澗寬平兩厓如縮東面石壁可數十丈瀑布懸
挂而下坪對絕巘卽上方峰斗壁直立鐵鎖下垂石上
鑿有小坎從下達上廬容履端視之股栗然非登岳要
路也自坪逆十八盤而上十里至青柯坪土曠而夷有
館款客坪卽在西峰下回巖曲磴雜樹倒懸斜溜飛泉
相激成雨余來時正值皎月喜不成寐山至此恰半坪
左上里許爲回心石蓋自此皆緣壁握縴而行游人畏
險輒還故云回心石傍又鐫有英雄進步處五字靜者
見危而生悔豪士乘險以就功志各不同也東上三里

許爲千尺幢幢上東北轉爲百尺峽峽險與幢稱而縮
水經注云天井裁容人穴空迂迴傾曲而上又云欲出
井望空視明如在室窺窗也楊嗣昌云形如槽櫪持金
繩探石竇以上或時晦冥疑在鼠穴木空也可謂善於
形容者出峽登望仙臺平可方丈眼界如豁行二里許
過二仙橋橋當山曲斷處用金貫石架木以行又數轉
至高厓俯見渭水爲俯渭崖橋西爲車箱厓人緣輪橫
度又徑老君犁溝直若引繩險踰於幢幢凹而犁凸也
距百尺峽約五里又行四里至雲臺峰兩峰翠律萬壑
幽深耳中惟聞松風之聲飄飄乎非人間世矣北行七
十餘步有坊曰白雲仙境又北數百步平行如掌有白
雲菴游止此而返當出峽時望雲臺峰上干霄漢及至
此仰視三峰矗矗又如出峽時之望雲臺峰矣時當十
月驟雨少頃舉目而上界松枝已帶雪矣迨返青柯館

日光爛然半日之閒一山之內而陰晴雨雪不同如此
山之高峻可知也今一閉目如在其閒因見山附記於
此又行五十里抵華陰縣未到二里許過漢神醫華陀
墓道墓距道尚遠又過符秦清河侯王猛墓冢甚大後
連一冢無考俱北向日尚未落亟往觀嶽廟有青牛柏
極古致有柏抱槐一株槐陰可蔭百餘人而柏尚存皮
圍裏柏如蟬蛻槐如負版亦生物之巧者也有唐^⑤宗
碑火毀按開元傳信記云華嶽碑係^⑤宗所書製碑高
五十餘尺闊丈餘厚五尺其陰刻扈從太子王公以下
官名制作壯麗今止存燼餘碑趺尚巋然也嶽廟古碑
最夥明時地震多損失今尚有昭告華陰碑韓賞撰韓
擇木八分書漢郭香察華山碑側有顏魯公除饒州刺
史謁祠題名暨他數碑無恙昔歐文忠公華嶽題名跋
云華嶽題名自唐開元二十三年訖後唐清泰二年實

掛鞍錄
三百一年題名者五百一人再題者三十三人往往當時知名士也又曰其姓名歲月風霜剝蝕亦或在或亡其存者有千仞之山石耳嗟夫古今一轍所謂臨長川而歎逝者也登萬壽閣南觀華嶽秀不可狀北望三河口卽洛河渭河黃河會歸處也洛水源出慶陽安化縣白於山渭水自渭源起行一千八百餘里至此始入黃河余可謂見其始末矣是夕宿嶽廟側
二十六日漏未盡一刻行三十里下馬拜漢大尉楊公震墓按公傳於延光中爲太尉以忠直被放歸卒於夕陽亭順宗卽位門人虞放陳翼詣闕追訟公事詔以禮改葬公於華陰潼亭祠以中牢卽此地也又行二十里次潼關縣潼水出於潼谷故漢以名關明以名衛國朝以名縣也卽古桃林地春秋晉使詹嘉守桃林之塞杜注曰桃林潼關是也茲邑西峙太華東踞嶠函南

控武關北扼蒲坂黃河如帶條山如屏古今倚爲重鎮焉諺曰潼關天井雞鳴三省誠然昔湯公斌任監司時刻唐明皇以下凡十有八人過關詩二十九首於東門樓壁殊可觀飯已過風陵渡河廣永較皋蘭所見豈特倍蓰哉晉民有攜酒漿迎至此者余曾任河東監司自此酬應益繁無暇記錄距京師尚隔二千二百四十五里云

右據鞍錄一卷 國朝楊應琚撰按應琚字松門正白旗漢軍人祖楊宗仁官湖廣總督諡清端父文乾官廣東巡撫松門由西寧道官至大學士管理雲貴總督辦緬甸兵事得罪賜自盡此錄乃爲西寧道時述職入都所紀歷敘道路風景考證古跡搜訪金石令人想見昇平氣象松門累代封疆未由科目出身文筆雅潔可愛執袴自安之輩相對亦應愧死錄云

清端公初升臨洮知府松門故由西路入洮秦出寶
雞逆祖德訪土風也惟記華嶽廟中古碑云漢郭香
察華山碑側有顏魯公題名此記舛誤魯公大曆九
年謁金天王祠題名在周天和碑側華山碑郭香察
書者早毀於嘉靖時矣光緒丙申長至前一日江陰
繆荃孫跋

據鞍錄

